



Ishara Maalum Itofautishayo

Kwa ajili ya hayo wana wa Israeli wataishika Sabato, kuiangalia sana hiyo Sabato katika vizazi vyao vyote, ni agano la milele. Ni ishara kati ya mimi na wana wa Israeli milele; kwani kwa siku sita Bwana alifanya mbingu na nchi, akastarehe kwa siku ya saba na kupumzika. —**Kutoka 31:16, 17.**

Katika Maandiko haya utunzaji wa Sabato umeelezwa bayana kuwa ishara maalum, ikitofautisha kati ya watu wa Mungu na watu wa ulimwengu. Hii inawapatia wazazi kazi maalum mno—kazi ya kuwafundisha watoto wao kuitii amri ya Sabato, ili kwamba waweze kuhesabiwa kuwa miongoni mwa watu wa Mungu.

Katika Kutoka 19 tunasoma: “Mmeona jinsi nilivyowatendea Wamisri, na jinsi nilivyowachukua ninyi juu ya mbawa za tai, nikawaleta ninyi kwangu mimi. Sasa basi ikiwa mtaitii sauti yangu kweli kweli, na kulishika agano langu, hapo ndipo mtakapokuwa tunu kwangu kuliko makabila yote ya watu; maana dunia yote pia ni mali yangu, nanyi mtakuwa kwangu ufalme wa makuhani, na taifa takatifu. Hayo ndiyo maneno utakayowaambia wana wa Israeli.”

Huku ni kujishusha kwa ajabu mno! Mungu anatoa ofa ya kuwafanya wana wa Israeli kuwa hazina Yake ya pekee, ikiwa watatii sheria Yake na kulitukuza jina Lake. Tazama majibu waliyotoa kwa maneno haya:

“Musa akaenda akawaita wazee wa watu, akawafunulia maneno haya yote, Bwana aliyokuwa amemwagiza.” Maagizo haya yote yaliwekwa na wazee mbele ya umati mkubwa uliokusanyika. “Watu wote wakaitika pamoja wakisema, Hayo yote aliyoyasema Bwana tutayatenda. Naye Musa akamwambia Bwana maneno ya hao watu” (Manuscript 152, 1901).

Ni ya juu mno thamani ya imani sahili na utiifu usio na shaka. Ni kwa kufuata njia ya utii kwa imani sahili ndipo tabia inapata ukamilifu. Adamu alitakiwa kutoa utii mkamilifu kwa amri za Mungu, na hakuna kiwango cha chini kinachowasilishwa kwa wale wanaotamani wokovu [leo]... Yesu anasema, “Nanyi mkiomba lo lote kwa jina langu, hilo nitalifanya, ili Baba atukuzwe ndani ya Mwana. Mkiniomba neno lo lote kwa jina langu, nitalifanya. Mkinipenda, mtazishika amri zangu. Nami nitamwomba Baba, naye atawapa Msaidizi mwingine, ili akae nanyi hata milele; ndiye Roho wa kweli; ambaye ulimwengu hauwezi kumpokea” (Yohana 14:13–17).... Ulimwengu unafanya mapatano dhidi ya ukweli, kwa sababu hautamani kuutii ukweli. Je! Mimi ambaye ninauelewa ukweli nifunge macho na moyo wangu kwa nguvu yake iokoayo kwa sababu ulimwengu unachagua giza badala ya nuru? (Letter 119, 1895).

Sheria takatifu ambazo Shetani anazichukia na kutafuta kuziharibu, zitaheshimiwa katika ulimwengu wote usio na dhambi (Patriarchs and Prophets, 342).